

## Huwelik 09

**Gen. 2:21** “Toe het die HERE God ‘n diepe slaap op die mens laat val; en **terwyl hy slaap**, het Hy **een van sy ribbebene geneem** en die plek daarvan met vlees toegemaak.

**:22** En die HERE God **bou die rib wat Hy van die mens geneem het, tot ‘n vrou en bring haar na die mens.** (Hier vind die eerste huwelik plaas)

**:23** Toe sê die mens: Dit is nou eindelijk **been van my gebeente en vlees van my vlees**. Sy sal **mannin** genoem word, want **sy is uit die man geneem**.

**:24** Daarom sal **die man sy vader en moeder verlaat en sy vrou aankleef**. En hulle sal **een vlees wees**.”

God sê die man en vrou sal **een vlees** wees, tog is daar so baie **geskille** en **verskille** in die huwelik.

Wat is die **heel groot rede** waarom daar so baie probleme in elke huwelik is?

Ek glo nie daar is ‘n **man en vrou** op hierdie aarde wat kan sê: “Ons het **nog nooit woorde** gehad nie.”

Ons huwelik is **absoluut volmaak**. Ons was nog nooit eers ‘n **bietjie dikmond** nie.

Ons het nog nooit oor **enigeiets verskil** nie.

(Indien dit so is, moet dit die **mees gehoorsame man** wees, wat daar nog ooit op hierdie aarde was.)

Nee geliefdes, **ons woon in SA** en nie in die **tuin van Eden** voor die sondeval nie.

Dit is baie duidelik dat Adam en Eva voor die sondeval **geen verskille** gehad het nie.

Adam moes ‘n **baie gehoorsame man** gewees het, want toe Eva vir hom sê om te eet het hy geëet sonder om enigsins te **argumenteer** of **terug te praat**.

Die Bybel sê hy het **geneem en geëet**. Hy het geensins **teëgepraat** nie.

Vandag verwag die vrouens dat die mans nog **dieselfde** sal wees. Ons mag nie **argumenteer** nie.

Ons moet net maak **soos liefie sê** en dan is die Kaap Hollands.

Maar nadat Adam en Eva **klaar geëet** het, het die saak so bietjie verander.

Onmiddelik na die sondeval **begin die probleem**.

Adam kom agter Eva het hom **ore aangesit**. Sy het hom gevang met 'n **slap riem**.

En nou is hulle **in die moeilikheid**. Hulle **kruip weg** vir God. Daar het 'n **skeiding** in hulle harte plaasgevind teenoor God.

Iets het **gebeur**... iets **verskrikliks** het gebeur.

Hulle voel nie meer **aangetrokke tot God** nie. Hulle het nie meer **vrymoedigheid** teenoor God nie.

Hulle kan nie meer **openlik voor God staan** nie. Hulle kom agter hulle is **naak**. Hulle **besef** hulle naaktheid.

Inderwaarheid staan hulle nou **naak voor God**. En nie net **liggaamlik** nie, maar ook **geestelik**.

Hulle weet hier het 'n **groot ding** plaasgevind... iets **baie erg** wat hulle nog nooit **voorheen ondervind** het nie, het gebeur.

Adam weet hy is in die **moeilikheid**. Hy **besef** hy is in die moeilikheid.

**En wat doen Adam?**

Wat is die **heel eerste ding** wat hy doen?

**Hy beskuldig vir Eva.**

**Dit is jou skuld!**            Eva, **dit is jy.**

Kyk nou net in watse **groot gemors** het jy ons laat beland.

En ons **kinders** en **kleinkinders** en ons **agterkleinkinders** en die **res van ons geslag** tot aan die einde van die aarde. **Almal** is in die moeilikheid.

Eva dit was **jy** ...!!! **Jy is die een**...!!!! Jy is die **probleem** in hierdie huwelik....!!!

As daar net **een ander vrou** op hierdie aarde was, het ek jou sommer **nou dadelik geskei**...

Jy kan bly wees jy is die **enigste vrou** op aarde.

Eva kyk net so 'n bietjie om jou en **sien wat het jy gedoen**.

Oral **skeur die aarde oop** en daar kom **nuwe plante** te voorskyn wat hulle nog **nooit voorheen** gesien het nie.

**Onkruid** en **bossies** vul die aarde.

Eva, jy gaan **skoffel**... Nee sê sy, **ek sal nie**... Jy het **saam geëet**... Jy kan maar **self** skoffel.

**Konflik in die huwelik.**

Wat doen Adam? 6000 Jaar later bou hy 'n **grassnyer** en hy gee vir Eva een Kersfees...

**Uit kom die skeibrief**...!

Hulle kan nie verstaan **wat gaan aan** nie.

Die leeu wat netnou nog daar eenkant **gestaan en wei** het, storm op hulle af en wil hulle **verskeur**... Hulle spring in 'n **boom** in en dan storm die leeu op 'n **onskuldige bokkie** af en vreet hom op.

So iets het hulle **nog nooit gesien** nie.

Wat sê Adam vir God? ? ?

Here, hierdie **vrou** wat U my gegee het...!

**Gen 3:11** “En Hy sê: Wie het jou te kenne gegee dat jy naak is? Het jy geëet van die boom waarvan Ek jou beveel het om nie te eet nie?

**:12** En die mens antwoord: **Die vrou wat U gegee het om by my te wees, sy** het my van die boom gegee, en **ek** het geëet.

:13 Daarop sê die HERE God aan die vrou: **Wat het jy nou gedoen?** En die vrou antwoord: Die **slang** het my bedrieg, en **ek** het geëet.”

Adam **beskuldig die vrou** en die vrou **beskuldig die slang** en so word ‘n **ketting van argumente** aanmekaar gesit tot **vandag** toe.

Hierdie argument het **nog nooit opgehou** nie.

Waar het dit **alles begin?**

In die **Paradys?** **Nee!!!**

**In die hemel...** Dit het in die **hemel begin**. Hierdie probleem het in die **hemel** ontstaan... Toe Lucifer teen God **in opstand kom** en homself **bo God** wou verhef.

**Jes14:12** “Hoe het jy uit die hemel geval, o môrester, seun van die dageraad! Hoe lê jy teen die aarde neergeslaan, oorweldigter van die nasies!

:13 En jy het in jou hart gesê: Ek wil **opklim in die hemel, my troon verhef bo die sterre van God** en **sit op die berg van samekoms** in die uithoeke van die Noorde.

:14 Ek wil klim **bo die hoogtes van die wolke**, my **gelykstel met die Allerhoogste!**

:15 Ja, in die doderyk sal jy neergewerp word, in die diepste plekke van die kuil!”

Hier is die **oorsprong** van alle probleme.

Die Satan is **bonatuurlik boos** en God het hom **uit die Hemel uitgewerp** op die **aarde**.

En as wraak begin hy met sy **vernietigingswerk** teen die skepping van God.

Hy begin by **die mens**.

Hy saai die saad van **tweedrag** in Adam en Eva se harte.

Dink maar net, indien hy kan verhoed dat hulle **voortplant**. Dan is die **kroon van God se skepping** daarmee heen.

Maak hulle **kwaad vir mekaar**, sodat hulle nie **kan voortplant** nie.

**Gen 1:27** “En God het die mens geskape **na sy beeld**; na die beeld van God het Hy hom geskape; **man en vrou** het Hy hulle geskape.

**:28** En God het hulle **geseën**, en God het vir hulle gesê: **Wees vrugbaar en vermeerder en vul die aarde, onderwerp dit en heers** oor die visse van die see en die voëls van die hemel en oor al die diere wat op die aarde kruip.”

God het die mens **na Sy Beeld gekape** en hulle **geseën** en **opdrag gegee** om te **vermeerder** en die **aarde te vul** en om te **heers** oor die skeppig van God.

God stel die mens aan om te **heers** en Lucifer hou nie daarvan nie, **hy wil heers**. Hy wil **in beheer** wees. Hy wil die **koning** van die aarde wees.

Hy wil die **mens uitroei**. Hy wil die mens **verdelg** van die aarde af.

Hy wil verhoed dat hulle **vermeerder**. Maar hy kon dit **nie regkry nie...** Nou gebruik hy ‘n **ander taktiek**.

God het die mens se **voortplantingsdrang so sterk** gemaak, dat dit al die **geskille** en **konflik** wat daar in die huwelik is oorbrug.

Al saai hy tweedrag in die huwelik **plant die mens nog steeds voort** en vermeerder die mens nog steeds op die aarde.

Wat doen hy nou?

Hy laat **mans met mans** en **vrouens met vrouens** trou.

En nou **lag** hy lekker.

Hy sê: “Nou wil ek sien **hoe plant julle voort...** Nou wil ek sien hoe **vermeerder julle...**”

Dit is **nie moontlik nie...**

Twee **mans** of twee **vrouens** kan nie voortplant nie. So huwelik --- Indien dit ‘n **huwelik genoem** kan word --- Is direk **teen God se opdrag** om te vermeerder en die aarde te vul.

Dit is ‘n **belediging** vir God.

Dit sê: “God het nie **geweet wat hy doen** nie.”

Dit is alleenlik net die **wil en die doel** van die Satan. Hy wil **God se skepping** hier op die aarde **verhoed** en **verdelg**.

Hierdie dinge gebeur omdat die mense nie die Woord van die Here **ken nie** en hulle ook nie **daaraan steur** nie.

**Hos 4:6** “My volk gaan te gronde weens **gebrek aan kennis...**”

En dit bring ons terug by ons vraag:

Wat is die **heel groot rede** waarom daar konflik in die huwelik is?

Geliefdes, die heel groot rede waarom daar **konflik in elke huwelik** is, is omdat **elke mens se hart bonatuurlik boos** is.

**In Lukas 11: 29 sê Jesus:** “...Hierdie geslag is boos...”

**Joh 3:19** “En dit is die oordeel: dat die **lig** in die wêreld gekom het, en die mense het die **duisternis liever gehad as die lig**; want hulle werke was **boos.**”

Klink dit vir ons soos **2009? ? ?**

Hoekom **gaan dit sleg** in die huwelik?

Want die mense het die **duisternis liever gehad** as die lig... En hulle werke is vandag **nog steeds boos**.

Waar het hierdie probleem ontstaan?

In die **tuin van Eden**, toe Adam **gehoorsaam aan Lucifer** gewees het en **on gehoorsaam aan God**.

Die oomblik toe **Eva eet** en sy gee vir Adam en **hy eet**, toe ontstaan daar **konflik in die huwelik**.

Konflik kom nie van ons **menslike tekortkominge** soos om die **kos te brand** of die **motor te stamp** nie,

Nee, dit kom van Adam en Eva se **on gehoorsaamheid aan God** in die tuin van Eden.

Waar lê die probleem?

**In die hart van elke mens.** Dit is die **sondenatuur van Adam** wat in ons woon.

Die **egbreek** en die **afgodediens** woon in ons harte.... In die hart van **elke mens**... daarom is daar **konflik** in elke huwelik... omdat elke mens se **hart boos** is.

Daar is net een rede waarom daar 'n **rusie en 'n argument** in die huis is. Dit is omdat Adam **on gehoorsaam aan God** gewees het.

En dit het **deurgedring na elke mens.**

**Rom 5:12** “Daarom, soos deur **een mens** die sonde in die wêreld ingekom het en **deur die sonde die dood**, en so die dood tot **alle mense deurgedring** het, ...”

Wie is die oorsaak van alles? **Lucifer** --- Die **slang** --- Die **duiwel**.

Hy sit agter **elke rusie en argument**.

Ek moet eers die duiwel in **my eie lewe** en in **my eie hart** oorwin en dan kan ek die konflik **in my huwelik** oorwin.

**Suster, jou man** is nie regtig so sleg soos jy gedink het nie.

**Broer, jou vrou** is nie so sleg soos jy gedink het nie.

Die sleg sit in **ons eie harte**. Ons moet dit **daar oorwin**.

Ek vra nou onlangs aan 'n gehoor: “**Waar kom die vrou vandaan?**”

En iemand antwoord: “**Uit die hemel uit.**”

Hy was **doodreg**... Die vrou kom **uit die hemel uit**... Sy is 'n **gawe van God**... **Pas haar op**. Gee haar **liefde**. **Bederf** haar en wees lief vir haar.

Maar omdat **my eie hart boos** is, daarom dink ek **my vrou is boos** of my man..

Hou op om jou **man of jou vrou** te verander --- Verander jou **hart** --- Verander jou **denke**. Dit is **al** wat moet verander.

Die krisis is nie **in die huwelik** nie, maar in **onself**... In ons **harte**...

**Jak 4:4** “Egbrekers en egbreeksters, weet julle nie dat die **vriendskap van die wêreld vyandskap teen God is nie**? Wie dan ‘n **vriend van die wêreld** wil wees, **word ‘n vyand van God.**”

In die heel eerste plek lê die probleem in **ons verhouding met God**... Omdat ons **viende en vriendinne** van hierdie wêreld wil wees.

**Waar** moet die herstel aan ons huwelik begin?

Deur ons **verhouding met God** te herstel.

Jesus het gekom om te **herstel** wat ons in **Adam verloor** het.

**Rom 5:15** “Maar dit is met die misdaad nie soos met die genadegawe nie; want as deur die **misdaad van die één** baie gesterf het, veel meer het die genade van God en die gawe deur die genade van die **een mens, Jesus Christus**, vir baie oorvloedig geword.

**:16** En nie soos deur één wat gesondig het, is die gawe nie; want die oordeel was uit één tot veroordeling, maar die **genadegawe** is uit baie misdade tot vrypraak.

**:17** Want as ten gevolge van die **misdaad van die één die dood geheers** het deur die één, veel meer sal hulle wat die oorvloed van die **genade** en van die **gawe van die geregtigheid** ontvang, in die lewe heers deur die **Één, Jesus Christus**.

**:18** Daarom dan, net soos dit deur **een misdaad vir alle mense tot veroordeling** gekom het, so ook is dit deur **een daad van geregtigheid vir alle mense tot regverdigmaking** van die lewe.

**:19** Want soos deur die ongehoorsaamheid van die **een mens baie tot sondaars** gestel is, so sal ook deur die **gehoorsaamheid van die Één** baie tot regverdiges gestel word.

**:20** Maar die wet het daar bygekome, sodat die misdaad meer sou word; en waar die sonde meer geword het, het die genade nog meer oorvloedig geword;

**:21** sodat, soos die **sonde geheers het in die dood**, so ook die **genade kan heers** deur die **geregtigheid tot die ewige lewe deur Jesus Christus**, onse Here.”

Dit is die **herstel vir elke mens** wat dit wil aanneem.

Met die sondeval was **Adam ontklee** van die Heerlikheid van God... Daarom sê hy: “**Ek is naak...**”

In Christus word **ons weer beklee** met die Heerlikheid van God.

**Gal 3:27** “want julle almal wat **in Christus gedoop** is, het julle **met Christus beklee.**”

En dit behels ‘n **volkome wedergeboorte.**

Dan besit ons nie meer die **sondenatuur van Adam** nie, maar ons ervaar die **Heerlikheid van God.**

En wanneer dit plaasgevind het, sal ons vind dat die **konflik in die huwelik**, het verdwyn.

**Dit is weg...** Net soos die **boosheid** wat in ons harte geheers het.

**Rom 6: 13** “maar stel julleself **tot beskikking van God** as mense wat uit die **dode lewend** geword het, en julle lede as **werktuie van geregtigheid** in die **diens van God.**

**:14** Want die **sonde sal oor julle nie heers nie**; want julle is nie onder die wet nie, maar **onder die genade.**”

Wanneer ons hierdie punt bereik het, sal die sonde nie **meer oor ons heers** nie, maar ons sal **meer as oorwinnaars** in Christus Jesus wees.

En dan vind ons daar is **geen probleme** meer in die huwelik nie.

Wie wil God vra om **sy huwelik te herstel** vandag?

Wie wil God vra om **in sy hart te kom woon?**